

七十二家集

張河間集卷之五

漢南陽張衡平子著

明閩漳張燮紹和纂

誥

東巡誥

惟二月初吉帝將狩於岱嶽展義省方觀民設
教丙寅朏率群賓備法駕以祖于東門屆于靈
宮是日也有鳳雙集於臺壬辰祀上帝於明堂
帝曰咨予不材爲天地主慄慄翹翹百僚萬幾

心之謂矣孰朕之勞上帝有靈不替朕命誕敢
不祇承凡庶與祭於壇墠之位者曰懷爾邦君
實願先帝載厥大宗以左右朕躬羣臣曰帝道
橫被旁行海表一人有避萬民賴之從巡助祭
者茲惟嘉瑞乃歌曰皇皇者鳳通玄知時萃於
山趾與帝邀期吉事有祥惟漢之祺帝曰朕不
敢當亦不敢蔽天之吉命

疏

大疫上疏

臣竊見京師爲害兼所及民多病死死有滅戶
人人恐懼朝廷焦心以爲至憂臣官在於考變
禳災思任防救未知所由夙夜征營臣聞國之
大事在祀祀莫大於郊天奉祖方今道路流言
僉曰孝安皇帝南巡路崩從駕左右行慝之臣
欲徵諸國王子故不發喪衣車還宮僞遣大臣
竝禱請命臣處外治不知其審然尊靈見罔豈

能無怨且凡夫私小有不蠲猶爲譴謫况以大
穢用禮郊廟孔子曰曾謂泰山不如林放乎天
地明察降禍見災乃其理也又問者有司正以
冬至之後奏開恭陵神道陛下至孝不忍距逆
或燔冢移尸月令仲冬土事無作慎無燔蓋及
起大衆以固而閉地氣上泄是謂燔天地之房
諸蟄則死民必疾疫又隨以喪厲氣未息恐其
殆此二年欲使知過改悔五行傳曰六沴作見
羗時共禦帝用不差神則不怒萬福乃降用章

于下臣愚以爲可使公卿處議所以陳術改過
取媚神祇自求多福也

陳事疏

伏惟陛下宣哲克明繼體承天中遭傾覆龍德
泥蟠今乘雲高躋盤桓天位誠所謂將隆大位
必先倥偬之也親履艱難者知下情備經險易
者達物僞故能一貫萬機靡所疑惑百揆允當
庶績咸熙宜獲福祉神祇受譽黎庶而陰陽未
和災眚屢見神明幽遠冥鑒在茲福仁禍淫景
響而應因德降休乘失致咎天道雖遠吉凶可
見近世鄭蔡江樊周廣王聖皆爲效矣故恭儉

畏忌必蒙祉祚奢淫誦慢鮮不夷戮前事不忘
後事之師也夫情勝其性流遞忘反豈惟不肖
中才皆然苟非大賢不能見得思義故積惡成
釁罪不可解也向使能瞻前顧後援鏡自戒則
何陷於凶患乎貴寵之臣衆所屬仰其有愆尤
上下知之褒美譏惡有心皆同故怨讟溢乎四
海神明降其禍辟也頃年雨常不足思求所失
則洪範所謂僭恒陽若者也懼羣臣奢侈昏踰
典式自下逼上用速咎徵又前年京師地震土

裂裂者威分震者人擾也君以靜唱臣以動和
威自上出不趣於下禮之政也竊懼聖思厭倦
制不專已恩不忍割與衆共威威不可分德不
可共洪範曰臣有作威作福玉食害于而家凶
于而國天鑒孔明雖疎不失災異示人前後數
矣而未見所革以復往悔自非聖人不能無過
願陛下思惟所以稽古率舊勿令刑德八柄不
自天子若恩從上下事依禮制禮制脩則奢僭
怠事合宜則無凶咎然後神望允塞災消不至

矣

駁圖讖疏

臣聞聖人明審律歷以定吉凶重之以卜筮雜之以九宮經天驗道本盡于此或觀星辰逆順寒燠所由或察龜策之占巫覡之言其所因者非一術也立言於前有徵於後故智者貴焉謂之讖書讖書始出蓋知之者寡自漢取秦用兵力戰功成業遂可謂大事當此之時莫或稱讖若夏侯勝眭孟之徒以道術立名其所述著無讖一言劉向父子領校祕書閱定九流亦無讖

錄成哀之後乃始聞之尚書堯使鯀理洪水九載績用不成鯀則殛死禹乃嗣興而春秋識云共工理水凡讖皆云黃帝伐蚩尤而詩識獨以爲蚩尤敗然後堯受命春秋元命包中有公輸班與墨翟事見戰國非春秋時也又言別有益州益州之置在於漢世其名三輔諸陵世數可知至於圖中訖於成帝一卷之書互異數事聖人之言執無若是殆必虛僞之徒以要世取資往者侍中賈逵擿讖互異三十餘事諸言讖者

皆不能說至於王莽纂位漢世大禍八十篇何
爲不戒則知圖讖成於哀平之際也且河洛六
藝篇錄已定後人皮傳無所容纂永元中清河
宋景遂以歷紀推言水災而僞稱洞視玉版或
者至於棄家業入山林後皆無効而復采前世
以爲證驗至於永建復統則不能知此皆欺世
罔俗以昧執位情僞較然莫之糾禁且律歷卦
候九宮風角數有徵效世莫肯學而競稱不占
之書譬猶畫工惡圖犬馬而好作鬼魅誠以實

事難形而虛僞不窮也宜收藏圖識一禁絕之
則朱紫無所眩典籍無瑕玷矣

請專事東觀收檢遺文疏

臣仰幹史職敢微官守竊貪成訓自忘頑愚願
得專於東觀畢力於紀記竭思於補闕俾有漢
休烈比久長於天地竝光明於日月昭示萬嗣
水永不朽也

求合正三史表

臣伏見陛下思光先緒以典籍爲本而史書校

別條異不同一貫建武以來新裁未就後漢書

畧曰易稱宓戲氏王天下宓戲氏沒神農氏作史遷獨載五帝不記神農氏沒黃帝堯舜氏作史遷獨載五帝不記三皇今宜并錄又一事曰帝系黃帝產青陽昌意周書曰乃命少皞清陽即清陽也今宜寔

定之

日蝕上表

今年三月朔方覺日蝕此郡懼有兵患臣愚以
爲可勅北邊須塞郡縣明烽火遠斥候深藏固
閉無令穀畜外露

書

與崔瑗書

乃者與朝賀明日披讀太玄經知子雲特極陰陽之數也以其蒲汎故故時人不務此非特傳記之屬心與五經擬漢家得二百歲卒乎所以作興者之數其道必顯一代常然之符也玄四百歲其興乎竭已精思以揆其義更使人難論陰陽之事足下累世窮道極微子孫必命世不絕且幅寫一通藏之以待能者

與特進書

蓬萊太史之秘府道家所貴衡斗得當之竊爲
幸矣

七

七辯

無爲先生祖述列仙背世絕俗唯誦道篇形虛
年衰志猶不遷於是七辯謀焉曰無爲先生淹
在幽隅藏聲隱景刻迹窮居抑其不遑盍往辯
諸乃偕而就之

虛然子曰樂國之都設爲閒館公輸制匠譎詭
煥爛重屋百層連閣周漫應門鏘鏘華闕雙建
彫蟲彤綠螭虹蜿蜒於是彈比翼落鸛黃加雙

鸛經鴛鴦然後擢雲觚觀中流擎芙蓉集芳洲
縱文身搏潛鱗探水玉拔瓊根收明月之照耀
玩赤瑕之璘璣此宮室之麗也子盍歸而處之
乎

雕華子曰玄清白醴蒲陶醲醢嘉肴雜醢三鸚
七菹荔支黃茸寒梨乾榛沙飴石蜜遠國儲珍
於是乃有芻豢膾牲麋麋豹胎飛鳧棲鷺養之
以時審其齊和適其辛酸芳以薑椒拂以桂蘭
會稽之菰蘘野之梁珍羞雜遝灼爍芳香此滋

味之麗也子盍歸而食之

安存子曰淮南清歌燕餘材舞列乎前堂通奏
代叙結鄭衛之遺風揚流哇而脉激楚

妖冶邀會觀者交

日衣解忘帶於是樂中日晚移卽昏庭美人妖
服變曲爲清改賦新詞轉歌流聲此音樂之麗
也子盍歸而聽諸

闕丘子曰西施之徒姿容脩嫵弱顏回植妍夸
閒暇形似削成腰如束素淑性窈窕秀色美艷

鬢髮玄髻光可以鑒磨輔巧笑清眸流眄皓齒
朱脣的皦粲練於是紅華曼理遺芳酷烈侍夕
先生同茲宴褻假明蘭燈指圖觀列蟬綿宜愧
天紹紆折此女色之麗也子盍歸而從之

空桐子曰交趾緌絺筒中之紆京城阿縞譬之
蟬羽製爲時服以適寒暑駟秀騏之駸駿載軫
獵之轡車建采虹之長旃系雌霓而爲旗逸駭
飈於青丘超廣漠而永逝此輿服之麗也子盍
歸而乘之

依衛子曰若夫赤松王喬羨門安期噓吸沆瀣
飲醴茹芝駕應龍戴行雲釋弱水越炎氛覽八
極度天垠上游紫宮下棲崑崙此神僊之麗也
子盍行而求之先生乃興而言曰吁美哉吾子
之誨穆如清風啓乃嘉猷實慰我心矯然傾首
邪睨玄圃軒臂矯翼將飛未舉

髣無子曰在我聖皇躬勞至思參天兩地匪忘
厥司率由舊章遵彼前謀正邪理謬靡有所疑
旁窺八索仰鏡二墳講禮習樂儀則彬彬是以

英人底材不賞而勸學而不厭誨而不倦於是
二八之儔列乎帝庭揆事施教地平天成然後
建明堂而班辟雍和邦國而悅遠人化明如日
下應如神漢雖舊邦其政維新而先生乃翩然
迴面曰君子一言於是觀智先民有言談何容
易予雖蒙蔽不敏指趣敬授教命敢不是務

設難

應問

有間余者曰蓋聞前哲首務務於下學上達佐國理民有云爲也朝有所聞則夕行之立功立事式昭德音是故伊尹思使君爲堯舜而民處唐虞彼豈虛言而已哉必旌厥素爾咎單巫咸實守王家申伯樊仲實幹周邦服袞而朝介圭作瑞厥跡不朽垂烈後昆不亦丕歟且學非以要利而富貴萃之貴以行令富以施惠惠施令

行故易稱以大業質以文美實由華興器賴雕
飾爲好人以輿服爲榮吾子性德體道篤信安
仁約已博藝無堅不鑽以思世路斯何遠矣曩
滯日官今又原之雖老氏曲全進道若退然行
亦以需必也學非所用術有所仰故臨川將濟
而舟楫不存焉徒經思天衢內昭獨智固合理
民之式也故嘗見謗於鄙儒深厲淺揭隨時爲
義曾何貪於支離而習其孤技邪參輪可使自
轉木雕猶能獨飛已垂翅而還故棲壺亦調其

機而銛諸昔有文王自求多福人生在勤不索
何獲曷若卑體屈已美言以相剋鳴于喬木乃
金聲而玉振之用後勲雪前吝婢佞不柔以意
誰斬也應之曰是何觀同而見異也君子不患
位之不尊而患德之不崇不耻祿之不夥而耻
智之不博是故藝可學而行可力也天爵高懸
得之在命或不速而自懷或羨旃而不臻求之
無益故智者偈而不思陋身以微幸固貪夫之
所爲未得而豫喪也枉尺直尋議者譏之盈欲

虧志孰云非羞於心有猜則簋飧饌餽餽猶不屑
餐旌簪以之意之無疑則兼金盈百而不嫌辭
孟軻以之士或解裋褐而襲黼黻或委市築而
據文軒者度德拜爵量績受祿也輸力致庸受
必有階渾元初基靈軌未紀吉凶分錯人用瞳
朦黃帝爲斯深慘有風后者是焉亮之察三辰
於上跡禍福乎下經緯歷數然後天步有常則
風后之爲也當少昊清陽之末實或亂德人神
雜擾不可方物重黎又相顓頊而申理之日月

卽次則重黎之爲也人各有能因執受任鳥師
別名四叔三正官無二業事不並濟晝長則宵
短日南則景北天且不堪兼况以人該之夫玄
龍迎夏則陵雲而奮鱗樂時也涉冬則涸泥而
潛蟄避害也公旦道行故制典禮以尹天下懼
教誨之不從有人之不理仲尼不遇故論六經
以俟來辟耻一物之不知有事之無範所考不
齊如何可一夫戰國交爭戎車競驅君若綴旒
人無所麗燭武懸繩而秦伯退師魯連係箭而

聊城弛柝從往則合橫來則離安危無常要在
說夫咸以得人爲梟失士爲尤故樊岑披帷入
見高祖高祖踞洗以對酈生當此之會乃黿鳴
而鼉應也故能同心戮力勤恤人隱奄受區夏
遂定帝位皆謀臣之由也故一介之策各有攸
建子長謀之爛然有第夫女魃北而應龍翔洪
鼎聲而軍容息溽暑至而鵠火棲寒冰沍而黿
鼉蟄今也皇澤宣洽海外混同萬方億醜并質
共劑若脩成之不暇尚何功之可立立事有三

言爲下列下列且不可廢矣奚冀其二哉于茲
縉紳如雲儒士成林及津者風攄失塗者幽僻
遭遇難要趨偶爲幸世易俗異事執舛殊不能
通其變而一度以揆之斯契船而求劍守株而
伺兔也冒愧違願必無仁以繼之有道者所不
廢也越王勾踐事此故厥緒不永捷徑邪至我
不忍以投步干進苟容我不忍以歛肩雖有犀
舟勁楫猶人涉卬否有須者也姑亦奉順敦篤
守以忠信得之不休不獲不吝不見是而不悒

居下位而不憂允上德之常服焉方將師天老
而友地典與之乎高睨而大談孔甲且不足慕
焉稱殷彭及周聃與世殊技固孤是求子憂朱
泮曼之無所用吾恨輪扁之無所教也子觀木
雕獨飛慙我垂翅故棲吾感去黿附鵠悲爾先
笑而後號也斐豹以斃督燔書禮至以撥國作
銘弦高以牛餽退敵墨翟以縈帶全城貫高以
端辭顯義蘇武以禿節效貞蒲且以飛燭逞巧
詹何以沈鉤致精奕秋以碁局取譽王豹以清

謳流聲僕進不能參名於二立退又不能羣彼
數子愍三墳之旣頽惜八索之不理庶前訓之
可鑠聊朝聽乎柱史且韞櫝而待價踵顏氏以
行止曾不慊夫晉楚敢告誠于知已

張河間集卷之六

漢南陽張衡平子著

明閩漳張燮紹和纂

議

曆議

延光二年詔者竝誦言當用甲寅元河南梁豐言當復用太初尚書郎張衡周興皆能曆數難誦豐或不對或言失誤衡與參案儀註考往使今以爲九道法最密詔下公卿詳議太尉愷等上侍中施延等議太初過天日一度弦望失正月以晦見西方食不與天相應元和改從四方四方雖密於太初皆不可用

寅元與天相應合圖讖可施行博士黃
廣大行令任僉議如九道河南尹祉等
議卽用甲寅元常陳元命包天地開闢
獲麟中百一十四歲推閏月六首其日
或測晦弦望二十四氣宿度不相應者
非一用九道爲朔月有比三六二小皆
疏遠元和變曆以應保乾圖三百歲斗
曆改憲之文四分曆本起圖讖最得其
正不宜易愷等議宜從太初尚書令忠
上奏諸從太初者徒以世宗懷夷廊境
享國久長爲辭或云孝章改四分災異
率甚未有善應臣伏惟漢祖受命因秦
之紀違於帝典太宗遵脩三階以平哀
平之際同承太初妖孽累仍疴禍非一
議者不以成數相參汎采妄說歸福太
初致咎四分漏見曲論未可爲是臣輒
復重難衡興議云

上然其言遂改曆事

五紀論推步行度當時比諸術爲近然猶未稽
於古及向子歆欲以合春秋橫斷年數損夏益
周考之表紀差謬數百兩曆相課六千一百五
十六歲而太初多一日冬至日直斗而云在牽
牛近濶不可復用昭然如此史官所共見非獨
衡興前以爲九道密近今議者以爲有闕及甲
寅元復多違失皆未可取正昔仲尼順假馬之
名以崇君之義况天之曆數不可任疑從虛以
非易是

說

渾儀

赤道橫帶渾天之腹去極九十一度十分之五
黃道斜帶其腹出赤道表裏各二十四度故夏
至去極六十七度而強冬至去極百一十五度
亦強也然則黃道斜截赤道者則春分秋分之
去極也今此春分去極九十步秋分去極九十
一步者就夏曆景去極之法以爲率也上頭橫
行第一行者黃道進退之數也本當以銅儀日

月度之則可知也以儀一歲乃竟而中間又有陰雨難卒成也是以作小渾盡赤道黃道乃各調賦三百六十五度四分之一從冬至所在始起令之相當值也取北極及衡各誠椽之爲軸取薄竹篋穿其兩端令兩穿中間與渾半等以貫之令察之與渾相切摩也乃從減半起以爲八十二度八分之五盡衡減之半焉又中分其篋拗去其半令其半之際正直與兩端減半相直令篋半之際從冬至起一度一移之視篋之

半際夕多黃赤道幾也其所多少則進退之數也從北極數之則元極之度也各分赤道黃道爲二十四氣一氣相去十五度十六分之七每一氣者黃道進退一度焉所以然者黃道直時去南北極近其處地小而橫行與赤道且等故以篋度之於赤道多也設一氣令十六日皆常率四日差少半也令一氣十五日不能半耳故使中道三日之中若少半也三氣一節故四十六日而差今三度也至於差三之時而五日同

率者一其實節之間不能四十六日也今殘日
居其策故五日同率也其率雖同先之皆強後
之皆弱不可勝計取至於三而復有進退者黃
道稍斜於橫行不得度故也春分秋分所以退
者黃道始起更斜矣於橫行不得度故也亦每
一氣一度焉三氣一節亦差三度也至三氣之
後稍遠而直故橫行得度而稍進也立春立秋
橫行稍退矣而度猶云進者以其所退減其所
進猶有盈餘未盡故也立夏立冬橫行稍進矣

而度猶退者以其所進增其所退猶有不足未
畢故也以此論之日行非有進退而以赤道重
廣黃道使之然也本二十八宿相去度數以赤
道爲強耳故於黃道亦進退也冬至在斗二十
一度少半最遠時也而此曆斗二十度俱百一
十五強矣冬至宜與之同率焉夏至在井二十
一度半強最近時也而此曆井二十三度俱六
十七度強矣夏至宜與之同率焉

靈憲

昔在先王將步天路用之靈軌尋緒本元先準
之於渾體是爲正儀立度而皇極有道建也樞
運有道稽也乃建乃稽斯經天常聖人無心因
茲以生心故靈憲作興曰太素之前幽清玄淨
寂寞冥默不可爲象厥中惟靈厥外惟無如是
者永久焉斯謂溟滓蓋乃道之根也道根旣建
自無生有太素始萌萌而未兆并氣同色渾沌
不分故道志之言云有物渾成先天地生其氣

體固未可得而形其遲速固未可得而紀也如是者又永久焉斯謂麗鴻蓋乃道之幹也道幹既育有物成體於是元氣剖判剛柔始分清濁異位天成於外地定於內天體於陽故圓以動地體於陰故平以靜動以行施靜以合化堙鬱構精時育庶類斯謂太元蓋乃道之實也在天成象在地成形天有九位地有九域天有三辰地有三形有象可效有形可度情性萬殊旁通感薄自然相生莫之能紀於是人之精者作聖

實始紀綱而經緯之八極之維徑二億三萬二千三百里南北則短減千里東西則廣增千里自地至天半於八極則地之深亦如之通而度之則是渾已將覆其數用重鉤股懸天之景薄地之義皆移千里而差一寸得之過此而往者未之或知也未之或知者宇宙之謂也宇之表無極宙之端無窮天有兩儀以儗道中其可觀樞星是也謂之北極在南者不著故聖人弗之名焉其世之遂九二而減二陽道左廻故天運

左行有驗於物則人氣左羸形左繚也天以陽
廻地以陰淳是故天致其動稟氣舒光地致其
靜承施候明天以順動不失其中則四序順至
寒暑不減致生有節故品物用生地以靈靜作
合承天清化致養四時而後育故品物用成凡
至大莫如天至厚莫若地地至質者曰地而已
至多莫若水水精爲漢漢用於天而無列焉思
次質也地有山嶽以宣其氣精種爲星星也者
體生於地精成於天列居錯峙各有適屬紫宮

爲皇極之居太微爲五帝之廷明堂之房大角
有席天而有坐蒼龍連蜷於左白虎猛據於右
朱雀奮翼於前靈龜圈首於後黃神軒轅於中
六擾旣畜而狼虬魚鼈同有不具在野象物在
朝象官在人象事於是備矣懸象著明莫大乎
日月其徑當天周七百三十六分之一地廣二
百四十二分之一日者陽精之宗積而成鳥象
鳥而有三趾陽之類其數奇月者陰精之宗積
而成獸象兔陰之類其數耦其後有憑焉者拜

請無死之藥於西王母姮娥竊之以奔月將往
枚筮之於有黃有黃筮之曰吉翩翩歸妹獨將
西行逢天晦芒母驚母恐後且大昌姮娥遂託
身於月是爲蟾蜍夫日譬猶火月譬猶水火則
外光水則含景故月光生於日之所照晷生於
日之所蔽當日則光盈就日則光盡也衆星被
耀因水轉光當日之衝光當不合者蔽於他也
是謂闇虛在星星微月過則食日之薄地其明
也繇暗視明明無所屈是以望之若火方於中

天天地同明，繇明瞻暗，暗還自奪，故望之若水。
火當夜而揚光，在晝則不明也。月之於夜與日
同而差微，是則不然。強弱之差也。衆星列布，其
以神著有五列焉。是爲三十五名。一居中央，謂
之北斗，動變挺占實司王命。四布於方，爲二十
八宿。日月運行，歷示吉凶。五緯經次，用告禍福。
則天心於是見矣。中外之官常明者，百有二十
四。可名者三百二十，爲星二千五百。而海人之
占未存焉。微星之數，蓋萬一千五百二十。庶物

蠢蠢咸得繫命不然何以摠而理諸夫三光同
形有似珠玉神守精存麗其職而宣其明及其
衰神歇精斃於是乎有隕星然則奔星之所墜
至則石文曜麗乎天其動者七日月五星是也
周旋右回天道者貴順也近天則遲遠天則速
行則屈屈則留留則逆逆則遲迫於天也
行遲者覲于東覲于東屬陽行速者覲于西覲
于西屬陰日與月此配合也攝提熒惑地侯見
晨附于日也太白辰星見昏附于月也二陰三

陽參天兩地故男女取焉方星巡鎮必因常度
苟或盈縮不逾于次故有列司作使曰老子四
星周伯王逢芮各一錯乎五緯之間其見無期
其行無度實妖經星之所然後吉凶宣周其祥
可盡

銘

綬笥銘 有引

南陽太守鮑德有詔所賜先公綬笥傳世用之
時德更理笥衡時爲德主簿作銘曰

懿矣茲笥爰藏寶珍冠纓組履文章日信皇用
我賜俾作帝臣服其令服鸞封艾緡天祚明德
大賚福仁垂光厥世子孫克神厥器維舊中實
維新周公惟事七涓有隣

誄

大司農鮑德誄

昔君烈祖平顯奕世敬叔生牙美管交頽至于
中葉種德以邁種德伊何去虛適參建旄屯留
其茂如林降及我君總角有聲遺蒙萬敷寵祿
斯丁守約勤學克勞其形濬哲之資日就月成
業業學徒童蒙求我舍厥往著去風卽雅濟濟
京河實爲西魯昔我南都惟帝舊鄉同于郡國
殊於表章命親如公弁冕鳴璜若惟允之實耀

其光導以仁惠教以義方習射矍相饗老虞庠
羗髡作虐艱我西鄰君斯整旅耀武月頻蝨蝨
戎虜是懼是震知德者鮮惟君克舉旣厭帝心
將處台輔命有不永時不我與天實爲之孰其
能禦股肱或毀何痛如之國喪遺愛如何無思

司徒呂公誄

昔呂皇祖帝堯之緒伯夷秩唐唐宗允叙四嶽
在虞傅士佐禹克厥帝心姓姜氏呂登是南邦
以家以處降及于周穆侯作輔寡于九族九族
用寧登受八命衮職靡傾黃耳金鉉公餽以盈
綽今其寬暇兮其清既明且哲式保令名旂旒
從風颺牡超驤去此寧寓歸于幽堂玄室冥冥
脩夜彌長

司空陳公誄

敬仲初育發繇卜箴鳳飛觀國流光末裔天祚
明德德茂于公入孝出友爰潛爰邕兼學多識
窮理知幾德音孔昭翻爾灰飛賦政二城還集
皇闡公實省之亶亶庶績公實靜之藹藹百僚
公實愍之乃陟司空纂禹之跡導揚徽庸致訓
京畿協和萬邦萬邦旣協殊服來同眇論前績
莫與比蹤

又

張河間集

卷六

十四

後作鴻臚職掌九賓輯寧侯衛懷柔遠人

原缺

當世所居之官輒積年不徙自去史職五載復還乃設客問作應問以見其志云陽嘉元年後造候風地動儀以精銅鑄成圓徑八尺合蓋隆起形似酒尊飾以篆文山龜鳥獸之形中有都柱傍行八道施關發機外有八龍首銜銅丸下有蟾蜍張口承之其牙機巧制皆隱在準中覆蓋周密無際如有地動準則振龍機發吐丸而蟾蜍術之振聲激揚伺者因此覺知雖一龍發機而七首不動尋其方面乃知震之所在驗之

以事合契若神自書典所記未之有也嘗一龍
機發而地不覺動京師學者咸惟其無徵後數
日驛至果地震隴西於是皆服其妙自此以後
乃令史官記地動所從方起時政事漸損權移
於下衡因上疏陳事初光武善識及顯宗肅宗
因祖述焉自中興之後儒者爭學圖緯兼復附
以妖言衡以圖緯虛妄非聖人之法又上疏譖
之後遷侍中帝引在帷幄諷議左右嘗問衡天
下所疾惡者宦官懼其毀已皆共目之衡乃詭

對而出閤豎恐終爲其患遂共譖之衡常思圖
身之事以爲吉凶倚伏幽微難明乃作思玄賦
以宣寄情志永和初出爲河間相時國王驕奢
不遵典憲又多豪右共爲不軌衡下車治威嚴
整法度陰知姦黨名姓一時收禽上下肅然稱
爲政理視事三年上書乞骸骨徵拜尚書年六
十二永和四年卒著周官訓詁崔瑗以爲不能
有異於諸儒也又欲繼孔子易說彖象殘缺者
竟不能就所著詩賦銘七言靈憲應間七辨巡

誥懸圖凡三十二篇永初中謁者僕射劉珍校
書郎劉騊駼等著作東觀撰集漢記因定漢家
禮儀上言請衡參論其事會竝卒而衡常歎息
欲終成之及爲侍中上疏請得專事東觀收檢
遺文畢力補綴又條上司馬遷班固所叙興典
籍不合者十餘事又以爲王莽本傳但應載篡
事而已至於編年月紀災祥宜爲元后本紀又
更始居位人無異望光武初爲其將然後卽真
宜以更始之號建於光武之初書數上竟不聽

及後之著述多不詳與時人追恨之

論曰崔瑗之稱平子曰數術窮天地創作倖造
化斯致可得而言歟推其圍籠兩儀天地無所
蘊其靈運情機物有生不能參其智故智愚引
淵微人之上術記曰德成而上藝成而下量斯
思也豈夫藝而已哉何德之損乎

贊曰三才理通人靈多蔽近推彤筭遠抽深滯
不有玄慮孰能昭晰

河間相張平子碑

漢崔瑗

河間相張君南陽西鄂人諱衡字平子其先出自張老爲晉大夫納規趙武而及其修書傳美之君天姿敞哲敏而好學如川之逝不舍晝夜是以道德漫流文章雲浮數術窮天地制作侔造化瓌辭麗說奇技偉藝磊落煥炳與神合契然而體性溫良聲氣芬芳仁愛篤密與世無傷可謂淑人君子者矣初舉孝廉爲尚書侍郎遷太史令實掌重黎歷紀之度亦能焯耀敦大天

明地德光照有漢遷公車司馬令侍中遂相河
間政以禮成民是用息遭命不永闇忽遷徂朝
失良臣民隕令君天泯斯道世喪斯文凡百君
子靡不傷焉乃銘斯表以旌厥聞其辭曰

於惟張君資質懿豐德茂材羨高明顯融焉所
不學亦何不師盈科而逝成章乃達一物不知
實以爲耻聞一善言不勝其喜包羅品類稟授
無形酌焉不竭冲而復盈廩廩其庶疊疊其幾
膺數命世紹聖作師苟華必實令德惟恭柔嘉

伊則孝友祗容允出在茲維帝念功往才女諧
化洽民離愍而不弔降此咎克哲人其萎罔不
時恫紀於銘勒永終譽兮死而不朽芳烈著兮
歐陽氏集古目錄跋尾漢張平子墓銘世傳
崔子玉撰并書按范曄漢書張衡贊云崔子
玉謂衡數術窮天地制作侔造化今銘有此
語則真子玉作也其刻石爲二本一在南陽
一在同城天聖中有右班殿直趙球者知南
陽縣事因治縣廨毀馬臺得一石有文驗之

廼斯銘也遂龕于廳事之壁其文至凡百君子而止其後半亡矣其在向城者今尚書屯田員外郎謝景初得其半於向城之野自凡百君子已上其前半亡矣今以二本相補續其文遂復完而闕其最後四字然則昔人爲二本者不爲無意矣唐寶應中有徐方回者別得二十一字云是銘最後文疑球所得南陽石之半亡者爾今後不復見則又亡矣惜哉

弔張衡辭

漢 彌衡

南岳有精君誕其姿清和有理君達其機故能
下筆綉辭揚手文飛昔伊尹值湯呂尚遇旦嗟
矣君生而獨值漢蒼蠅爭飛鳳凰已散元龜可
羈神龍可絆石堅而朽星華而滅惟道興隆悠
永靡絕君音永浮河水有竭君聲永流旦光沒
發余生雖後身亦存遊士貴知己君其勿憂

過張平子墓

唐駱賓王

西鄂該通理南陽擅德音
玉卮浮藻麗銅渾積思深
忽懷今日昔非復昔時今
日落豐碑暗風來古木吟
惟歎窮泉下終鬱羨魚心

遺事

安帝時劉千秋校書東觀好事者樊長孫與書
曰漢家禮儀皆隨律令在理官藏於秘閣無紀
錄者令二代之業闇而不彰誠宜撰次依擬周
禮定位分職各有條序令人無愚智入朝不惑
君公族元老正丁其任焉可以已劉君遷爲宗
與邑子通人張平子參議未定而劉君遷爲宗
正衛尉平子爲尚書郎太史令各務其職未暇
恤也順帝時平子爲侍中典校書方作周官解

說欲以漢次述漢事會復遷河間相遂莫能立

後漢書

百官志

張衡高才過人性明天象建州浦城縣山有獸
名駭神豕身人首狀貌醜惡百鬼惡之好出水
邊石上平子往寫之獸入水中不出或云此獸
畏寫之故不出遂去紙筆獸果出平子拱手不
動潛以足指畫之今號巴獸渾

郭氏異
物志

張衡死月蔡邕母始懷孕此二人才貌甚相類

人云邕是衡之後身

殷芸
小說

集評

思玄精練而和惠欲麗前人而優游清典漏幽

通矣

陸士衡

孫興公云三都二京五經鼓吹

世說新語

平子豔發文以情變絕唱高縱久無嗣響

沈約宋書

平子淹通故慮周而藻密

文心雕龍

張衡二京迅發宏富

文心雕龍

張衡怨篇清曲可味仙詩緩歌雅有新聲

文心雕龍

張衡七辨結采綿靡

文心雕龍

張衡應問密而兼雅

文心雕龍

張衡天文之妙冠絕一代所著靈憲渾儀畧具

辰耀之本今備寫載以裨其理

劉昭漢書補註

平子桂林理在文外

李白

寄興高遠遺辭自妙

詩譜

張衡四愁遙裏耿慕猶風騷之遺韻也

竹林詩評

孟堅兩都不如張平子平子雖有衍辭而多佳

境壯語

藝苑卮言

平子二京文理卓然

物理論